

Høyringsvar om regional plan for kompetanse og arbeidskraft Hordaland

Bømlo Næringsråd

Bømlo Næringsråd er interesseorganisasjonen for alle som driv næring på Bømlo. Me representerer 90 bedrifter, med nær 4000 tilsette og over 8 mrd kr i årleg omsetning.

Mål

Bømlo Næringsråd stiller seg bak både det foreslåtte overordna målet og dei tre foreslåtte hovudmåla. Men me vil understreka at målet om betre balanse mellom tilbod og etterspurnad etter kompetanse og arbeidskraft i Hordaland gjennom eit forpliktande samarbeid mellom næringslivet, offentleg sektor og utdanningsaktørane må visa att i praktisk politikk.

Bømlomodellen

Bømlo Næringsråd vil peika på **Bømlomodellen** for relasjon og samhandling mellom kommune, næringsliv og vidaregåande skule som eit godt døme på korleis utdanning og arbeids- og næringsliv jobbar saman for å utvikla seg i takt med kompetansebehovet i kommunen og regionen vår. Me vil oppmoda om at **Bømlomodellen** vert støtta opp under og vidareutvikla for å visa korleis ein kan oppnå tettare kontakt mellom vidaregåande skular og lokale bedrifter.

Samhandling i fylkeskommunen

Bømlo Næringsråd har gjennom dei siste åra generelt og det siste året spesielt observert at tenesteområda "Utdanning" og "Nærings- Samfunnsutvikling" ikkje kommuniserer godt nok. Ei strategisk samhandling mellom desse områda og ein meir heilskapleg tankegang ville gjort godt for samfunnsutviklinga. Dette ser me at høyringsutkastet tek opp, og me håpar det vert omsett i konkret handling. Skuleutvikling er alt for viktig for samfunnet til at det kun er kortsiktige bedriftsøkonomiske omsyn knytta til skuledrifta som vert styrande. Me oppmodar om at ein ser heilskapleg på korleis ein skal utvikla skulen, lokalsamfunna, næringslivet og dermed heile Hordalandskompetansen og -konkurranseskrafta.

Linjestructur og dimensjonering av fag- og yrkesopplæring

Bømlo Næringsråd meiner at detaljbeslutningar om linjestructur og dimensjonering bør takast på lokalt nivå. At fylkestinget vedtek linjetilbod ("bokstavkombinasjonane") meiner me er ei uheldig detaljstyring som ikkje tener næringslivet og samfunnet for øvrig sine behov. Me meiner at fylkestinget skal vedta rammer og at ein lokalt skal utvikla linjetilbod. Dimensjoneringa må attspeгла prognosane for utvikling i ungdomskull. Me tillet oss å påpeika at desse er stabile for Bømlo i åra som kjem.

Lokal kompetanse og utvikling

Planen seier at det er klar samanheng mellom kor lett ein får tilgang på kompetent arbeidskraft og kor nært utdanningsinstitusjonane og bedriftene er lokalisert. På Bømlo har me ein variert næringsstruktur, med høg andel sysselsette i industrien. Bedriftene konkurrerer på verdsmarknaden, med høg eksportandel. Krava til kompetanse- og teknologiutvikling er høge. Dette må visa att i organisering av skuletilbod.

Gode lokalmiljø og utviklinga av desse heng nøye saman med kor lenge ungdommane er busette lokalt. Skal Bømlosamfunnet utvikla seg vidare, må ein oppretthalda og utvikla det vidaregåande skuletilbodet. Ungdommane er med på å halda oppe eit rikt kultur- og idrettsliv, og det er bevist at sannsynet for å venda tilbake til lokalmiljøet sitt etter endt høgare utdanning og arbeidserfaring andre stader, er vesentleg større når ein tek den vidaregåande utdanninga si lokalt. At ungdommane får med seg den lokale gründerkulturen er heller ikkje skadeleg for samfunnsutviklinga.

Oversiktlege lokal- og skulemiljø er også viktig for å hindra skulefråfall. Fråfall har som kjend ikkje ubetydelege kostnader for samfunnet.

Styret i Bømlo Næringsråd, 22.06.2017

Ove Grønås

Lars Magne Endresen

Kjetil Aga Gjøsæter

Solfrid S Stavland (nestleiar)

Simon Nesse Økland (leiar)